



CBS ta informa:

Censo Economico ta un fuente valioso di informacion pa inversionistanan

Oficina Central di Estadistica (CBS) ta sigui informa comunidad riba importancia di Censo Economico 2014 y cual censo a cuminsa siman pasa dialuna y lo continua te cu 17 di november proximo. Te cu awor e cooperacion di parti di doño y/of managernan di e establecimentonan ta bayendo hopi bon y e encuestadonan no ta hayando contratiempo pa obtene tur e informacionnan necesario for di e ehecutivonan aki.

Pa e biaha aki CBS ta duna dos ehempel di informacionnan valioso cu por wordo obteni for di e Censo Economico aki. A haci uzo di informacion y mapanan preliminar cu a wordo compila na cuminsamento di 2014 specialmente pa e Censo Economico 2014.



Den e prome grafico ta ser ilustra e cantidad di supermercadonan na Aruba, segun distrito. Aki por mira claramente cu na Noord/Tanki Leendert e cantidad di supermercadonan ta esun di mas halto, esta 27, sigui pa Oranjestad Oost cu 21 supermercado. E distrito cu tin menos supermercado ta San Nicolas Noord cu 8 supermercado.

Si haci distincion entre Pabao y Pariba di brug, Pabao di brug tin un total di 93 supermercado y Pariba di brug tin solamente 27 supermercado.

Den e di dos grafico ta ser ilustra e cantidad di supermercadonan pa 1000 hogar (densidad). Remarcabel ta cu un di districtonan cu tin menos cantidad di supermercado (10), esta San Nicolas South, tin e densidad di mas halto, esta 5.5 supermercado pa 1000 hogar. E districtonan cu tin e densidad di supermercado di mas abao ta Savaneta (2.3) y San Nicolas South (2.3).



Cu e dos ehempelnan aki CBS kier a mostra cu e datonan obteni for di un Censo Economico por yuda den planificacionnan strategico y formula maneho confiabel y duradero. Den e caso di supermercadonan, inversionistanan potencial por tin un bista cla y conciso di e cantidad y densidad di supermercadonan na Aruba y cu e informacionnan aki nan por evalua si nan lo bay haci e inversionnan necesario den e sector aki of den cual districto esaki lo duna miho rendimiento. CBS ta spera cu e cooperacion pa cu e Censo Economico 2014 lo continua den e simannan venidero.